

Cari perdamaian di Angola: PM

Oleh Kamal Ahmad

KUALA LUMPUR, **Jumaat** — Datuk Seri Dr Mahathir Mohamad merayu semua pihak yang terbabit di Angola berusaha mencari jalan mewujudkan perdamaian serta kestabilan di negara itu.

Perdana Menteri melancarkan kebimbangan itu berikutan ancaman baru kemungkinan perang yang lebih besar meletus di Angola.

Dalam satu pernyataan bersama Malaysia dan Namibia, yang dikeluarkan oleh Wisma Putra, hari ini, Dr Mahathir berkata, semua pihak terbabit harus menghormati harapan rakyat Angola dan berusaha apa saja untuk mewujudkan perdamaian serta kestabilan.

Sehubungan itu, beliau merayu semua pihak dari luar untuk menghentikan usaha yang boleh mengancam proses peralihan di Angola.

Rayuan dan kebimbangan yang sama juga dilahirkan oleh Presiden Namibia, Dr Sam Nujoma.

Kedua-dua pemimpin

itu juga melancarkan kebimbangan mengenai keganasan yang berterusan di Afrika Selatan serta kurangnya perpaduan di kalangan majoriti penduduk kulit hitam.

Sehubungan itu, mereka menyeru semua pihak, terutama Kerajaan Afrika Selatan, supaya berusaha mempercepat penubuhan kerajaan sementara yang demokratik, tanpa perkauman serta Afrika Selatan yang bersatu.

Sementara itu, Dr Mahathir mengucapkan tahniah kepada Dr Sam berhubung perjanjian mengenai pentadbiran bersama Walvis Bay dan Off-Shore Island, yang berkuatkuasa 1 November lalu.

Manakala Dr Sam mengucapkan terima kasih kepada Perdana Menteri kerana sokongan kerajaan Malaysia ke arah menjayakan pelaksanaan Resolusi 432 (1978) Majlis Keselamatan Bangsa-Bangsa Bersatu.

Mengulas mengenai la-



DR SAM NUJOMA...turut lahirkan kebimbangan

watan ke Namibia, Dr Mahathir berkata, ia membuka peluang untuk memperkukuhkan semangat kerjasama dan persefahaman serta menunjukkan komitmen Malaysia untuk terus bekerjasama dengan negara itu.

Pada masa yang sama, kata Perdana Menteri, ahli perniagaan yang menyertai rombongan



DR MAHATHIR...khuatir ancaman perang baru

Malaysia berpeluang melihat peluang perdagangan dan pelaburan yang boleh disertai, dengan lebih dekat lagi sejajar dengan keperluan pembangunan di Namibia.

Kedua-dua pemimpin juga meneruskan perbincangan mengenai beberapa perjanjian akan datang yang dapat mempertingkatkan lagi kerjasama di masa depan.